

定鄉小識卷五

錢塘張 道少南

山水記^五 白巖山路

白巖山上有天池下爲水塢有炊香泉山東
爲蜂房巖西有又來泉塢前爲寶鑑池西南
塢口爲珠峯爲石蓮花峯出塢西北爲胡家
嶺爲黃梅山山下爲戴家塢塢南爲金家嶺
爲陸太師嶺嶺東爲飛鳳形山爲旋網山白
巖東南爲轉手塢塢南爲牛卵山東爲龍尾
塢又東爲范家嶺又南爲白沙山山南爲紅

定鄉小識卷五

一

泥嶺又白巖東北爲鷺鷥嶺下爲犁頭塢南
出爲楊家門山至桑柳畝爲眠牛山爲定南
山有人大嶺爲水牛山又南爲象山山下爲
馬浦又東近江爲杜家浦爲王安步又東爲
曹家步又白巖西南爲白巖嶺南出爲滕村
嶺爲張家山爲仙家隴至村口爲九泡山爲
鳳凰山田中爲龜山又南爲飯包山沿江而
南爲長壽溪合於凌溪

白巖山 咸淳臨安志城東北諸山有白巖山夢梁
錄城東北有白巖山萬厓杭州府志在縣治西南

五十里高九百二十丈周回十五里萬厯錢塘縣志粟山西爲白巖山康熙錢塘縣志郡志在縣西南五十里高九百二十丈周十五里山形峯巒多石極爲險阻舊邑志有尊勝寺自滕村至歸龍橋數里夾道皆修竹縣西南山此爲最勝案馬郡志白巖有二一在城西南將二十里或山有二亦未可知第云有尊勝寺則誤矣

白巖山高摩青漢氣象尊嚴定鄉諸山自焦山而外無與弟曩雖岷岷天宮茱萸譚經諸峯尙作兒孫環列矣山勢危厓壁立峻絕莫攀樵父

定鄉小識卷五

二

蕘童罕抄其徑脫巾仰睇欲墮瑤簪但見蒼嵐白雲冠覆峯頂乃眾山之鼻祖一鄉之雄鎮也山自餘杭徑山分支西南數十里山胥屬雲初其大幹直趨富春

白巖十景 康熙錢塘縣志案白巖有十景白巖山蜂房巖天池寶鑑池又來泉炊香泉珠峯石蓮花峯歸龍橋思君子徑

十景皆釋淨符所名歸龍橋列隄衍思君子

徑列古蹟略

釋淨符

字位中
廬陵人

白巖

雖是峻嶒絕所依千峯仍不礙來歸風光直與日
爭耀劈面還多險峻機

釋佛臣

汀州人

白巖

萬斛晴光照翠微岱嵩隱隱望中低煙飛雲卷仍
多致異翮靈蹄日是依

天池 在白巖山絕頂大旱不涸池中時有雲氣
獮鳥飲浴樵蹤罕至

釋淨符

定鄉小識卷五

三

天池

溶溶絕頂玉光浮水性因徵徧且周來歷此中君
欲究霞蒸霧捲是源頭

釋佛臣

天池

湖海無心作巨流一泓清澈貯峯頭浴殘夜夜星
和斗變化偏多鱗甲儔

水塢 卽白巖山塢尊勝寺正居塢中

釋淨符

山居詩

結茅鄰水石不爲學寒灰閒掘松根芷和雲種綠
苔
幽花無姓氏古木不知年終日茅檐底相看靜若
淵
花木遶籬種無如多種竹來春雨水調便可齊茅
屋
撥火尋煨芋開軒望遠峯溪風情更好送到隔林
鐘
茅屋兩三間閒僧四五個飢尋烟樹村倦便巖臺
臥

定鄉小識卷五

四

秋氣入林泉別開詩眼目閒攜七尺藤月下尋新
菊
炊煙寒石竈樵語冷山亭欲有新成句牀前蘚陣
青
峯潑滿空翠桐鋪匝地陰小亭二三子六月話冰
心
峯影侵簾幙松聲冷夢魂爐煙寒不耐飛出到柴
門
十年炙手地一旦參天早誰信我林泉虛空堪竝
老

松枝掩洞門花瓣亂樵路竟日杳無人泉聲聞隔
樹

疎雨斂秋霄乃生遲月想山邊與澗邊獨自成來
往

一雁入雲中銜書竟何去累我半年思不得詩成
句

無聲乃天籟有言非至音蒼厓摩漢碧萬古道入
心

山窗開萬竹相對殊無俗路險不聞樵棋聲有茅
屋

定鄉小識卷五

五

除去雲來往誰爲曲磴行歸禽臨薄暮卻慣認溪
聲

自攜影子息巖陰霜雪忘來兩鬢侵無法可煩僧
史筆祇餘一片寂寥心

喜開窗着樹梢房臥看山光又水光舒卷快人心
眼處匡廬好可不思量

榮辱無從入夢侵石牀饒臥萬松陰自無鹽醬勞
人吻贏得青苔一徑深

黃葉慵拈誑小兒甘同蛇虎歲忘機白雲也嬾爛
斑去溪口鋪橋自把持

指斷前溪石作關此生深許一身間日長自覺無
餘事斜倚孤松數亂山

遲遲寒日挂煙蘿冷澹門牆客罕過卻笑歌聲烘
手地於今空有綠陰多

肚皮繫束三條篋門徑饒堆十丈苔未許春風來
報道山南海又換桑栽

日煖風輕草色妍空山無事晝堪眠竹牀不作人
間夢多在古松流水邊

老屋年年補綠蘿自憐懶散笑還歌石苔路滑風
難立除卻白雲誰更過

定鄉小識卷五

六

衲衣染就烟霞色瓦竈煨殘草木年卻笑近來庄
計拙春風只在鑿頭邊

蕭疎山徑盡莓苔繞屋梅花冷淡開最是牽人情
思處三更月下鶴飛來

疎散慵將禮數存客辭猶懶送離門年來卻有閒
情緒踏雪尋梅過遠村

曉起披衣寐不成難禁山鳥更多情翻思昨夜松
棚月有語從人說未明

濃塗淡抹曉山煙似有還無斷復連仙彩筆頭收
不得祇應天遣贈枯禪

鑿得池方一丈慳堆堆寒影只秋山要添亭子閒
來坐指點松杉去取閒
嫩涼爽氣賸南軒清政何妨理硯田天亦愛人幽
致好盡扶花影壓低煙
春晴楊柳鳥關關洞口人來只問山笑指那邊青
靄裏茅庵一個老僧閒
衲解襪糝洗怒濤輕寒猶挂綠楊梢山頭春事成
狼藉十里溪流總碧桃
插槿編籬關月色披沙洗筧活泉聲就中一段居
山事幾度分題咏不成

定鄉小識卷五

七

瘦影擎秋竹數竿小窗長日見高寒未須灑入幽
人墨戀戀枝頭只素鸞
一徑苔深古磴幽陰陰老木夏生秋過橋層疊雲
如鑠不放鐘聲下翠樓
破窗不拒零星月老屋愁支倔彊風寒到嬾裁荷
葉禦地爐有火賸通紅
雲蒼蒼處水泠泠贏得清閒一白丁隱几無聊堪
對話好山插漢向人青
溪窗雨醒瀑聲轟絕壁雲看畫裏無別出一枝千
丈石撩天柳栗倩誰扶

老樹扶疎夏亦涼
小窗橫敞看雲忙
卻嫌日子閒
難過細數鷺鳧泛野塘

刪詩几上初憑月
移菊籬邊每趁秋
生計近來尤
喜別墨花灑處翠巒幽

萬斛松陰覆蘚墀
日供清賞亦何私
雀雛似爲憐
春去對對銜花上故枝

山鳥啼煩爭出谷
梅花開老半侵苔
更憐野寺鐘
聲好時嫁東風送嶺來

繞徑苔花帶雨肥
祇緣山外客來稀
軒窗竟日閒
無事聽嬾春禽啼落暉

定鄉小識卷五

八

曉嶂雲開翠堪掬
風打瀑花濺寒木
樵歌牧唱聽
未闌詩聲又在尖頭屋

半山水處竹籬邊
細雨斜風屋數椽
好殺畫圖收
不得祇堪分付與詩禪

漠漠煙凝洞口津
碧桃花放阮郎春
叮嚀莫遺靈
雲見賺殺謝家船上人

翠岫新抽雨後煙
泉聲重理伯牙絃
前溪古寺春
仍在繡壁苔花大過錢

萬斛炎雲一雨清
竹軒高敞快人情
黃鸝話我青
山句隔木雙雙有底聲

天生骨氣薄封侯坐石聽泉足自由十里梅花殘
雪徑無人一日幾回游

茅堂除卻往來雲面面軒開只此君相對豈惟差
免俗風前時散好清芬

青山饒我挂瓢棲疊石編茅喜近溪信是虎蛇堪
作侶果然鳧雁不須齊一池荷葉晴隄外十里烟
村古渡西最是屋邊松頂鶴長年肯代報更雞
疎籬雨打柱根斜破落家風許自誇蛙語荒池喧
鼓吹苔痕古壁走龍蛇窗前竹漸齊高樹架上書
多掩落花昨夜門忘關竹筴案頭案尾總煙霞

定鄉小識卷五

九

谷靜煙寒未肯流卻宜瓢笠話休休鐫炊春午餘
松粉幔卷秋煙賸月鉤屋後修篁撩碧落山前斜
磴傲公侯莫言出語便棱角住處多因在嶺頭
已把形骸齊槁木年來又得好思量千山躡屐看
雲浪十里攜筇探藕香蘆粟收完三畝月砂柑種
熟滿林霜明春尚有前溪霧不學當年住首陽
日用巖居事事便春風細草勝輕氈綠蔬陰塢栽
濃霧破衲晴樓洗瀑泉午夢無人驚竹榻地爐有
火示薪傳自從入得山來住石爛苔枯知幾年
鳥欲留春忍亂啼雲飛遠岫屋檐低蘭苞未瀉風

前玉笋指先伸雨後泥村曲到山唯採牧古人入
夢只夷齊石厨不是無煙火餐贖松花飲贖溪
位中山居詩五絕凡百十六首七絕九十首七
律三十餘首茲採其尤佳者錄諸

炊香泉 在尊勝寺香積厨後引流接筧汲以供炊
晝夜潺潺不絕泉味清甘絕似湖上六一泉

釋淨符

炊香泉

爲助金牛舞意殊涓涓流入到香厨人如點滴沾
脣吻毛骨當令頃刻蘇

定鄉小識卷五

十

釋佛臣

炊香泉

源頭究未許人知足供烹炊事事宜就裏有般香
味別頓令飲者豁雙眉

蜂房巖 在白巖山前尊勝寺左巖石空洞形如蜂
房故名

釋淨符

蜂房巖

天成層疊宛蜂房尤羨尊卑做廟廊日釀雲蒸年
更好就中有味異瓊漿

釋佛臣

蜂房巖

玲瓏天設趣何多絕勝蜂成釀蜜窠春暖花香風
響處主臣尤見有山阿

又來泉 在白巖山西塢中久涸釋淨符結茅山中
泉復至故名釋明穉位中禪師行狀先是山西塢
有泉甘甚涸數年矣及師至泉復湧出鄉人驚異
聚觀呼爲又來泉

釋淨符

又來泉

定鄉小識卷五

十一

出處因徵與道符被人剛把又來呼化鵬起蟄渾
閒事別有功滋帝者都

釋佛臣

又來泉

澤枯何法已多年此日緣誰返固然可見山靈微
有待應其時乃復涓涓

寶鑑池 在白巖山路口釋淨符所鑿山居詩云鑿
得方池一丈慳堆堆寒影只秋山又云鑿池邀古
月皆指此白巖山水自尊勝寺西溪流過歸龍橋
折而入池乃洩於長壽溪池圓如鑑故名世傳池

岸投物不能越池戊申冬予往游以石試之信然
池今已湮

釋淨符

寶鑑池

澈底澄清萬象該果然鑑照越秦臺魚龍不礙恣
游泳尤見涵泓化育才

釋佛臣

寶鑑池

青山鑿就水漣漣一鏡澄清月似圓峯影參差爭
出沒魚龍尤見躍雲天

定鄉小識卷五

十二

珠峯 在尊勝寺前塢口寺之案山也山不甚高而
圓淨如珠故名登寺中祖燈閣以望孤圓聳翠宛
如羣龍戲珠

釋淨符

珠峯

仙子遺來此地妍精光何啻媚山川幾回曲盞擡
眸處絕勝龍姬獻昔年

釋佛臣

珠峯

漫比龍姬價萬千精光燦燦媚山川神蛟不敢輕

偷採千古雲頭色更鮮

石蓮花峯 在尊勝寺前塢口珠峯之西石峯纔巖
竦立形如蓮花瓣今居民煉石爲堊鑿削日滋已
破損不堪矣

釋淨符

石蓮花峯

何年落地湧來殊不假中天雨露濡瓣瓣砰磷開
有韻寄言周子見曾無

釋佛臣

石蓮花峯

定鄉小識卷五

十三

陸地何生菡萏枝令人欲賦費沈思嚴霜酷雪難
摧折別有奇香扇闌維

右位中與佛臣白巖十景偈今各錄八首其歸
龍橋思君子徑詩別錄位中本工詩是偈乃禪
家祕機別有寄託與山居詩殊致不可以詩律
繩也佛臣和偈似屬下乘以位中集所附載且
十景題咏絕少故存諸

胡家嶺 咸淳臨安志胡家嶺在長壽鄉極峭峻頂
有石井旱不涸夢梁錄胡家嶺在錢塘長壽鄉其
嶺極峭峻有石井旱不涸康熙錢塘縣志分金嶺

北達餘杭路又有胡家嶺亦北達餘杭

黃梅山 康熙錢塘縣志郡志在縣治西南五十里
高八百丈周十里山麓綿邈而東經二十里溪水
環集多植竹里人取竹爲紙

山俗呼黃梅十八塢自戴家塢東北而入皆是
相傳山稅爲定南諸里散納每冬日瀕江村民
千百入塢採樵弗禁洪氏西溪志云黃梅山有
光明寺譌光明寺在青山非與黃梅近者也乃
傳聞誤耳

戴家塢 在黃梅山南有陸太師墳出南爲金家嶺

定鄉小識卷五

十四

金家嶺 在戴家塢南嶺極平坦東西高峯夾峙一
澗橫流竹樹廬舍揖青圍碧極幽峭雋秀之致嶺
上爲金姓聚居下嶺二里許入東北爲戴家塢指
北直行達餘杭折而西抵金子隴爲白沙塢南出
滕村水洩長壽溪

陸太師嶺 在金家嶺下

飛鳳形山 在金家嶺東

旋網山 在飛鳳形山東

轉手塢 在白巖山東南

牛卵山 在轉手塢南

龍尾塢 在轉手塢東

范家嶺 在龍尾塢東

白沙山 在龍尾塢南土白如堊泡浮浪捲不生草木

紅泥嶺 在白沙山南殷赤如血其浮捲與白沙山同不生草木父老言昔勦山寇時礮擊所致形家云天牛所耕終莫知其故也嶺與白沙山相去百餘步丹鮮雪素絕不間襍四時如赤城之霞江中望之遙遠皆見

鷺鷥嶺 康熙錢塘縣志白巖山北有鷺鷥嶺高二丈長五里杭州府志在白巖山北高二丈長五里

定鄉小識卷五

十五

嶺平坦不險峻踰嶺而北爲崇覺寺

犁頭塢 在鷺鷥嶺下

楊家門山

眠牛山 萬厯錢塘縣志白巖之支東南行爲眠牛山俗名桑柳坂康熙錢塘縣志舊邑志眠牛山近青山俗名桑柳坂

定南山 康熙錢塘縣志桑柳坂有定南山人大嶺 萬厯錢塘縣志白巖之支東南行爲人大

嶺康熙錢塘縣志定南山旁爲人大嶺

人大嶺今俗呼牛駝嶺

水牛山 在人大嶺南

象山 崇雅堂詩集注按象山高數十丈與定山東西對峙各志俱失載今據誌銘補入

象山在定山東桑柳坂水口山也形如臥象而定山別名獅子山各肖獸形山古有彌陀寺乾隆中相國梁文莊公 諭葬於此杭堇浦撰墓誌銘胡氏所據誌銘此也

馬浦 在象山下

定鄉小識卷五

十六

杜家浦 在定山東受桑柳坂定南山下諸溪之水遶象山而西入浦以洩於江浦上有橋卽杜家橋浦外塘下今已漲沙成田浦流淤塞但存形勢矣王安石 在杜家浦此步命名不解何義豈黃岸之譌耶與王安石名同莫詳其始

曹家步 在王安石西

白巖嶺 萬厯杭州府志在白巖山南康熙錢塘縣志白巖山南有白巖嶺高三十丈長一里

嶺在白巖山西踰嶺爲金家嶺

滕村嶺 咸淳臨安志滕村嶺在錢塘縣舊治西南

到縣五十里康熙錢塘縣志白巖山有滕村嶺高十丈長二里南達楊村

嶺與石龍山小嶺通踰小嶺爲湖步魏氏志云南達楊村蓋昔時楊村爲地甚大與湖步近也

張家山 在滕村南

仙家隴 在滕村南

九泡山 鳳皇山 竝在村口

龜山 在定山北田中甚低小形如龜

飯包山 在石龍山頭之東近凌溪

長壽溪 萬厓錢塘縣志長壽溪自石龍山出定山

定鄉小識卷五

十七

浦入於江

溪受金家嶺白巖山諸水自滕村沿石龍山達於凌溪入定山浦

凌溪 咸淳臨安志凌溪在錢塘縣長壽鄉

凌溪宋時屬長壽鄉故咸淳志疆域門長壽鄉有凌溪里今屬定南鄉是溪在石龍定山之間水入定山浦宋時有凌姓居此故名溪上有橋今猶呼凌家橋

定鄉小識卷五